

FAASOLOGA O LOTU TALOSAGA
TAUSAGA FOU 2025
EKALESIA FAAPOTOPOTOGA KERISIANO SAMOA

UPU TOMUA:

Manuia le Tausaga Fou. E ofo alofa ma faafeiloai atu i le Suafa o le Atua Tolu Tasi Paia i tulaga faalupelupeina o le Ekalesia Aoao; mai ona Ao se'ia oo ane i alo ma a tatou fanau. Ia mapu maia i fale nei; tautai a'e ma se'i e matu ane, faamalo le folau. Aua ua logo i tino matagi lelei, ina ua pale mai la ta folauga i le 2025. E ui i lou lua soifua solofuea ma le galutu'ia i fatia o le folauga. Peitai ane, ua taeao afua ma malo ua maua, ina ua tatou sapi ma patipatia le alofa tula'i o le Ao o le Ekalesia, ua tatou tuta ai i nuu matagofie i le ulua'i aso o le Tausaga Fou 2025. O alofa molipo ma afioga tuu aao mai a lo tatou Alii o Keriso *“Faauta foi, ou te ia te outou i aso uma lava, e oo lava i le gataaga o le lalolagi.”* Le Keriso foi lea na ia ta'utino mo lana Ekalesia Paia. *“O ia o le Alefa ma le Omeka, o le Amataga ma le Gataaga; o Lē muamua ma Lē mulimuli.”*

O le Atua lava lea na te toe faaauauina faatasi ma i tatou la ta faigamalaga o lenei tausaga fou 2025. E tele pea ma anoanoa'i fe'au ma ou tuatuagia e fia faa'umaina o loo faatalitali mai, e tumau foi ou faiva alofilima ma lau anavatau, e ala i lou soifua tapua'i i lou Atua. O le tatalo ia tautai pea lo tatou Matai i lenei tausaga ma ona faamoemoega. Ia maua pea lo tatou loto tetele, onosai ma faatuatua i le Atua e ta'ita'iina ai la tatou malaga o lenei tausaga.

Faafetai mo lenei valaau faaaloalo mai le Laulau ā Fono Komiti Au Toeaina, e fai ai le faatauvaā e tapenaina lenei Tusi o Lotu Talosaga Amata o le Tausaga Fou 2025.

Manuia le Tausaga Fou.

Saitumua Tafaioalii FT
EFKS-UTAH AMERIKA
PULEGA MATU
MATAGALUEGA AMERIKA

ASO LULU: **Ianuari 01, 2025**

Tusi Faitau: **Teuteronome 31:1-6**

Matua: **Teuteronome 31:6 “Ia outou faamalolosi, ma outou loto tetele, aua tou te fefefe, aua foi ne’i matata’u i o latou luma; auā o le Alii lou Atua, lua te o faatasi ma ia; na te le tuuna oe, na te le lafoai ia te oe.”**

Manatu Autu: **“E NOFO AE OLO”**

Ua tuana’i le tauafiafi o le 2024 ua fultua mai. Ae peitai ane **“TATOU TE NONOFO AE OLO”** i le vaogagana ma le uiga loloto o lenei muagagana a le atunuu. E faaauauina pea, ua na’o se mapu ane teisi ae le’i tini ma tau lau o le faamoemoe, e foufou ma tuutuu loloa. A ua manatu Mose, ua gagaifo lona malosi ma ua latalata i le tauafiafi o lona ola. A ua i le mamea foi lo la fala fofola ma le Atua e na te lē sopo’ia le loritana. Ua tatau ona ui lana ‘ula ia losua e fai ma ta’ita’i na te faaauauina ma faataunuu le malaga i le nuu folafolaina. O lana faatofala’iga i upu faamalosi’au ma faamafanafana, na tuu taliga ia losua ma le nuu. **“Ia outou faamalolosi, ma outou loto tetele, aua tou te fefefe pe matata’u, aua o le Alii lou Atua, lua te o faatasi ma ia, na te le tuuna oe, na te le lafoai ia te oe.”** E le’i pouliuli losua ma le nuu i le tele o to’atugā ma fitā, sa le mamoe le fili o le ala, na fano soifua ma ola, ae le’i faavaatu’ia ai pe toe tolopoina ai le faamoemoe mo le nuu paia. Sa sopo ma le loto tetele, se’ia oo ina taunuu pei ona molimauina. Le Ekalesia; **“TATOU TE NONOFO AE OLO”**. E le mailoa aga o le 2025 pe faapefea mai, o le ala foi o le a savalia e le faigofie, e filogia i lelei ma faaletonu, o aso lelei ma aso leaga. A’o saunoaga ma faalaeiau a Mose le auauna a le Atua mo tatou lana Ekalesia. Ua palalau mai o se gapiā e fai ma ou oso i le faigamalaga o lenei tausaga fou. Ua fetalai foi ma malele le Ao o le Ekalesia, **“Faauta foi, ou te ia te outou i aso uma lava, e oo lava i le gataaga o le lalolagi.”**

Tatalo Faafetai:

Ia tatou faafetaia le Atua, e ui i faigata ma faafitauli sa faafelavei i la tatou folauga mai lenei tausaga, a’o lea ua pale fiafia le malaga i lenei tausaga fou. Faafetaia ana meaalofa sa faatamāoaigaina ai i tatou, i le tino, mafaufau, loto ma

le agaga. Ia faafetaia foi le Atua; ona o lona mana fesoasoani, sa faamafanafana, faalototele, lavea'i ma ta'ita'iina ai i tatou. O lona filemu foi sa leoleoina ma puipuia ai mai taua, vevesi ma puapuaga o le olaga. *(faaauau tatalo faalotoifale)*

Tatalo Faatoesega:

Ia tatou faatoesega i le Atua, ua atulasi ma anoanoa'i folafolaga i amataga o tausaga, ae le'o suia o tatou uiga. Sa leai se faamaoni, sa femoumoua'i, loto masalosalo ma faavaivai. Sa lape ma faatamala la tatou auaunaga, sa fai o tatou loto ae tuu lona finagalo ma lana faasinoga. *(faaauau tatalo faalotoifale)*

Tatalo Manaoga:

Ia tatou tatalo i le Atua mo la tatou folauga o lenei tausaga fou. Ia foai mai le loto tetele, onosai, mataala ma le faautauta. O le loto finafinau mo faamoemoega lelei auā fanau, aiga, nuu, atunuu ma lana Ekalesia mo le manuia o tagata uma. Ia tatou tatalo foi mo tatou Ta'ita'i faale-malo, i a latou pulega ia faia ma le amiotonu ma le alofa. Ia tatou tatalo foi mo si a tatou Ekalesia Aoao i Samoa ma atunuu e mamao, i le Laulau a le Fono Tele, Laulau ā Fono a Tamā o le Ekalesia, A'oga, Kolisi Faafaifeau, Aulotu, Pulega, Matagaluega ma soo se itufale o lana Ekalesia, ina ia toina mai ona MANUIA mo fe'au faaauauina o lenei tausaga fou. *(faaauau tatalo faalotoifale)*

ASO TOFI: **Ianuari 02, 2025**

Tusi Faitau: **Mataio 6:25-34**

Matua: **Mataio 6:33 “A ia outou mua'i saili lona malo ma lana amiotonu, ona faapoopoina atu lea o ia mea uma ia te outou.”**

Manatu Autu: **“IA SAILI MUAMUA LE ATUA I LENEI TAUSAGA FOU 2025”**

Ua tatala le au'afa ma le faapolopolo a le lagi, ina ua palalau ma folasia, auā se gapiā e fai ma oso i le faatamasoaliiga, ma sailiga malo a le tagata. Ina ua pisapisaō, malomaloā, lē mautonu, popole, atuatuvaile ma fememea'i le tagata, ina ua fetaia'i ma souaga o aso faisoo. Ina ua i fale le matega i faafitauli ma lā mala e faafelavei. A ua molimau le Fai-Evagelia o Mataio; ua sunu'i e Keriso le alafale o le Talalelei i loto o lona ausoo, o e ua faalioli e asaina le gasū ma

momoli le fe’au faamafanafana, fe’au faalototele, fe’au faalaei’au ma le fasinoga tonu, e tafi’esea ai noanoataga o loo olopalaina ai le soifua o le tagata i aso faisoo. Ina ua fetalai Iesu: ***“Aua tou te popole i o outou ola, i mea tatou te aai ma feinu ai, poo outou tino i ofu tou te oofu ai. Ia outou vaavaai i manu felelei, matamata i lautalotalo o le vao. O ia mea na faia e le Atua, ae le sili ea ona faa’ofuina outou o e faatuatua itiiti.”*** Le Ekalesia, talofa e, e ui ina fou le tausaga ae le’o alofia i tatou mai le popole, atuatuvaale ma le fememea’i pe a oo ina osofia lo tatou sa folau e peau lagavale, ua tele ina avea ma gasegase matautia ua fano ai o tatou tagata. E ui ina ua mutia le ala o le Talalelei ma fetalai mai Iesu. I le ala matagofie ma le faasinoga tonu tatou te saili ai manuia o le tino, mafaufau, loto ma le agaga. Ina ua ia fetalai, ***“Ia mua’i saili le Atua ma lana amiotonu;”*** aua a maua le Atua, ona faaopoopoina mai lea o mea uma o atugalua, popole ma tatou fememea’i ai i lau folauga o lenei tausaga fou. O le faamanatu, ***“saili muamua le Atua i lenei tausaga fou 2025.”*** Pe a sa’o le faamuamua, ma tonu le sailiga, ona pale lea ma taunuu i manū lau folauga amata o lenei tausaga fou.

Tatalo o le Faafetai:

Ia faafetaia le Atua, i le puipuia pea o Samoa mai mala ma faigatā matautia, o loo aafia ai nisi atunuu tetele o le lalolagi, e pei o lologa, afā, afi, mafuie ma sunami malolosi, faama’i ma le fasioti tagata. Ia faafetaia foi le Atua, ona o pulega lelei i totonu o aiga, nuu ma si o tatou atunuu, ua taofiofia ai le sasao faaafi a’e o tu ma amioga le taupulea. Ia faafetaia foi le Atua ona o le Tusi Paia ua fai ma molimau o lona finagalo, e a’oa’o ma faatonu mai ai i le tagata. Ina ia mua’i saili lona malo ma lana amiotonu, ona faaopoopoina mai ai lea o mea uma e mana’o i ai le tagata. *(faaaauu tatalo faalotoifale)*

Tatalo Faatoesega:

Ia tatou faatoese i le Atua, ona o le lē faamaoni o tatou loto e faatino ai lo tatou valaauina ma le filifilia i soo se galuega, tatou te mumusu e ta’uvaleaina ma tuua’ifuaina ona o le faia o le amiotonu a le Atua. Ua tatou faitau i le Tusi Paia, tatalo, pepese, faalogo i lauga, faitaulaga, aai ma feinu i le tino ma le toto o Iesu, a ua teena e o tatou loto lana Afio. Faatoese i le Atua, ona o pulega sauā i totonu o aiga, ua aafia ai fanau teine ma Tinā, ona o le faaoolima o nisi Tamā, i amioga mataga ua faia i a latou lava fanau. *(faaaauu tatalo faalotoifale)*

Tatalo Manaoga:

Ia tatou tatalo i le Atua mo le filemu, i malo o le lalolagi o loo feagai ma taua, ua fasiotia ai nai fanau ma le anoanoai o tagatanuu. O e ua leai ni mea o nonofo ai, fia aai ma fia feinu, manunu'a ma puapuagatia, fanau ua leai ni matua, o matua foi ua fasiotia nai a latou fanau. O nai tagata ua avea faatagata o taua e oo lava i nai fanau. Tatalo mo le manuia o galuega a foma'i ma tausii ma'i, ma e o sailiilia vailaau ma fualaau mo togafitiga o gasegase matautia, e faapea foi i galuega a alii ma tamaitai leoleo, o fitafita ma vaegaau mo le puipuia o le filemu i nuu ma atunuu. Ia tatou tatalo mo le manuia o le galuega faale-Talalelei a Ekalesia Kerisiano uma i le lalolagi. (*faaaauu tatalo faalotoifale*)

ASO FARAILE: **Ianuari 03, 2025**

Tusi Faitau: **Ioane 15:1-11**

Matua: **Ioane 15:5 “O a’u nei o le vine, o la outou. O le tumau ia te au, ma au ia te ia, o ia lava e fua tele mai; aua e le mafaia e outou ona fai o se mea e tasi pe a au le i ai.”**

Manatu Autu: **“IA TUMAU I LE ALII.”**

O se faatusa manino ma malamalama gofie ua aumaia i a’oa’oga a Iesu, e tau faatusatusa i ai le sootaga a le tagata ma le Atua. Aua o le Atua o le to’ala faa’autama mo le tagata. O le gafa faaaauuina na fanauina mai le lagi mo le lalolagi. O le ala foi lea e le tuuaunoaina ai e le Atua le tagata. Ua a’oa’o foi Iesu ma talatala le gafa i usuga e afua mai i le pogai (vine), auā e faatupu ola le pogai, e fesa’aa’i o la malosi, ina ia tapu’e e le isi le ola lelei o le isi. E le feteena’i, ae fetausia’i ma fefaaaloaloa’i. E le mafai ona ola le isi e aunoa ma le isi. Aua e tasi le pogai, e ui ina felavasa’i ona lala a’o le tino lava e tasi. O se li’o faalotoifale o loo lipoi ma matimati a’e ai le felagolagoma’i. ***E pei ona faailoa e Iesu i le vine, ma ona la o’i tatou.*** Ae mulia’i o loo fatonu ma faasino mai ia te i tatou e Iesu, ***“e le mafaia e i tatou o se mea e tasi pe a leai o IA. O loo molitino i ona soo se feau faatupu manatu i le va o ia ma lona Tama, o le galue vine ia.”*** Le mamalu e, o le ekalesia ma le afaatuatua, o le a tatou savalia le ala o lenei tausaga. O le aao faaola o Keriso, ma lo tatou limalima faatasi ma ia, e taoto ai i lagatonu ma mamau ai fausaga o lo tatou sa folau o lenei tausaga fou. O upu matagofie faalaeiau a le aumatutua, ia toese lava a nuu potopoto ma tatou soalepule, auā e mamao le ala, o lo tatou sa e moomia le taualo faatasi, o le tatou avega e tausoa

faatasi. Fai mai upu a le poto; ***“E sili ona lelei o le toalua nai lo le toatasi, aua afai e pa’ū le tasi e faatua o ia i luga e lē la te toalua.”*** O loo faailoa mai foi e le aposetolo o Paulo i lana faamalosī’au i le aukerisiano puapugatia i Roma: ***“Pe afai e au le Atua ma tatou, o ai se faasaga tau mai.” Iesu foi ua fetalai: Aua e le mafaia e i tatou o se mea e tasi pe a leai o IA.”*** O le faamanatu lea ma le logologopuialii mai ia Keriso, e mafai mea uma, tini ma taunuu o tatou faamoemoega lelei o lenei tausaga, pe afai tatou te Tumau i le Alii.” ***E leai foi se mea e faigatā i le Alii.***

Tatalo Faafetai:

Ia tatou faafetaia le Atua ona o a’oa’oga i totonu o si o tatou atunuu, ua a’oa’oina ai fanau i le poto salalau mai A’oga Tulagalua se’ia o’o a’e i Kolisi ma lunivesite. E faapea foi i a’oga faale-lotu ma ona Kolisi Faafaifeau. E faafetaia le Atua ona o le tomai ma le agavaa, onosai ma le loto faapalepele o Pule A’oga ma Faia’oga i o latou tiute ma lo latou valaauina. Ia faafetaia le Atua ona o i latou uma o e o tofu sao ma galulue mo le manuia o a’oga auā fanau a le atunuu. *(faaaauu tatalo faalotoifale)*

Tatalo Faatoesea:

Ia tatou faatoese i le Alii, ona ua le faia o tatou tiute faa-matua feagai ma le a’oa’oina o fanau i le faasinoga a le Tusi Paia, aemaise o lotu i totonu o aiga ma tapuaiga i Aso Sa. Ua leai foi se faamaoni o le ekalesia ma lana afaigaluega, e a’oa’o atu le Tusi Paia ma lana molimau i e o galala ma matelaina faale-agaga. Ia faatoese i le Atua; i le tuinanau ma le matape’ape’a i ‘oa ma tupe, mamalu ma le pule, a ua faagalo tiute ma lo tatou valaauina e ala i lana Talalelei. O le ola faatauemu ma faifai i nai tagata vaivai ma matitiva, aemaise nai fanau ma mātua ua faapologaina, a ua tatou mumusu e lavea’i ma fesoasoani i ai. *(faaaauu tatalo faalotoifale)*

Tatalo Manaoga:

Ia tatou tatalo ma faatoga i le Atua, ia oo mai lona malo ma ia faia lona finagalo i le lalolagi, e pei ona faia i le lagi. Ia aveesea le faamata’u mai o meatau matautia, e faaleagaina ai le matagofie o le foafoaga, ma fano ai soifua o tagata. Ia tatou tatalo i le Atua, ina ia tafi’esea fualaa faasaina, ua faaleagaina ai alo ma fanau o si o tatou atunuu. Ua avea fualaa faasaina ma ala o sailiga tupe a nisi tagata, ma avanoa foi ua oo mai ai aupega matautia ma amioga mataga ua molimauina. Ia

tatou tatalo ina ia tumau le Alii i le folauga o lenei tausaga. (*faaaauu tatalo faalotoifale*)

ASO TOONAI: **Ianuari 04. 2025**

Tusi Faitau: **Kenese 19:15-29**

Matua: **Kenese 19:17 “Ua ta’ita’iina i latou e i la’ua i tua, ona faapea atu lea o ia, Ina sola ia e te ola ai, aua e te tepa i tua, aua foi e te tu i se mea o le fanua laugatasi; a ia e sola lava i le mauga ina ne’i malaia oe.”**

Manatu Autu: **“IA USITA’I I LE FAASINOGA A LE ATUA.”**

Ua taufao le mai ma le magalo, malaia poo le manuia, oti ma le ola o le nuu o Sotoma ma Komoro. Ua fua le tapu e uiga i le fe’au a agelu a le Atua ia Lota ma lona aiga, o le a mu le foaga ma tafieseae le aai. Ina ua sasao faaafi le amioleaga, ua taugā la latou ta, ua aunoa foi ma se loto salamo. O le mea o le a tupu, ua peiseai Sotoma ma Komoro e luai mai e se liona feai, ae pa’ū i totonu o se afi mu saesae. Ona o Sotoma ma Komoro ua o ni eleele e le faamalieina i le agasala, a’o se afi ua le faamalieina i fafie, ina ua fai ma tiute tauave le ala usu e saili le agasala, ma fai ma vaisu le amioleaga. Ia manatua foi, e a Sotoma ma Komoro e agasala, ae fesiligia ai e Aperaamo le faamasinoga tonu a le Atua. Ina ua manatu Aperaamo e pei o upu a le atunuu. “E a ulu tafega ae selefutia ai fua Vaisigano, poo le lavea fua Foaga ae lei faimisa.” Pe se mea tatau ona faasala faatasi le tagata amiotonu ma le amioleaga? Peitai ane, e oo a i le avā a Lota sa faaveluatai ma faa-lotolotolua, na afua ai ona ia solia faasinoga ma liu tupua masima ai. O se iuga faavauvau foi na oo i ai afafine e toalua o Lota mulimuli ane. Le ekalesia, e ui ina tatou nutimea faatasi ma le lalolagi faalemigao, ae tatau lava ona taofiofi i’u maea ma onosai, e matimati ma lipoi so tatou taeao āfua. O le anavatau e faamaite pea i lenei vaitau, o le asō e fo-alamea aua so tatou gapiā mo le faigamalaga umi o lenei tausaga. Ia tatou ta i luma e maua ai malo, ia aua tatou te toe apaapa ma faliu i tua, ne’i pei i tatou o le ava a Lota. E finagalo Iesu ia tatou ta i luma faatasi ma IA, aua se manuia mo lenei tausaga fou. Ua fetalai Iesu, ou te tuuina atu outou ia outou o, ma ia outou fua tele mai. Ia usitai le Ekalesia i le faasinoga a le Atua e manuia ai.

Tatalo Faafetai:

la tatou faafetaia le Atua, ona o lona fetalai mai e ala i le Tusi Paia, ua fai lea ma faasino ala e ta'ita'iina ai lana ekalesia ma o tatou tagata. Faafetaia le mana o lona Agaga Paia, o loo mafai ai e ana auauna faifeau, ma e o i ai tomai faapitoa latou te faamatalaina ai le loloto o ana afioga mamana, ua fai ai le Tusi Paia ma molimau ola o lona finagalo alofa i tagata. la tatou faafetaia foi le Atua, ona o lana faaolataga mo le tagata, e ala ia lesu Keriso o Le na fanau mai ia Maria le taupou. Ua avea ma ogatotonugalemu o le togiola mo le tagata agasala. *(faaauau tatalo faalotoifale)*

Tatalo Faatoesega:

la tatou faatoesega i le Atua, ona o lo tatou loto masalosalo, ola femoumoua'i, fiu gofie, fefefe ma palaaai ona o le itiiti o le faatuatua ma le leai o se faamoemoe i lana Afio. Tatou faatoesega i le Atua, ona ua tatou tuuvale lona tamaoaiga foai mai, e atiae ai fanau, aiga aemaise o lana ekalesia. O le faatamala foi ma le faatalale i tiute ma tofiga ua valaauina i ai i tatou. la faatoesega foi ona o le faapaie ma le faapalapala e saili i tatalo i lana Afio, i mea tatou te manuia ai. *(faaauau tatalo faalotoifale)*

Tatalo Manaoga:

la tatou tatalo i le Atua, ina ia faatumauina ma faatupuina pea lona mamalu ma lona paia, o lona pule aoao i le lalolagi ma le lagi, ia faaalua foi ana galuega mamana i loto o tagata. Tatou tatalo mo le loto faamaoni ma le alofa, ina ia fai ma vaipuna e pupuna a'e pea ma tatafe malolosi i totonu o ekalesia kerisiano uma i Samoa ma le lalolagi atoa. la tatou tatalo mo le aukerisiano faapuapuagatiaina i nisi atunuu ona o le Talalelei. la tatou talosiaina la tatou faigamalaga faale-aufaatuatua o lenei tausaga, ina ia faateleina ni a tatou tapuaiga i totonu o malumalu ma fiafia tagata uma e auai, nai lo ni sailiga o le tamaoaiga. *(faaauau tatalo faalotoifale)*

ASO SA: **Ianuari 05, 2025**

Tusi Faitau: **Luka 22:39-46**

Matua: **Luka 22:44 “Ua puapuaga o ia, ua atili ai lana tatalo; o lona afu foi ua pei o le alualu toto ua pa’ū ifo i le eleele.”**

Manatu Autu: **“IA SAUNI MA TAPENA MO FAIGATĀ, AE FAAMOEMOE I LE ATUA MO SE TAUNUUGA MANUIA.”**

Talofa e, i lou soifua ma lo tatou ola e pule’esea, pe tofafā ma manū ae sau mala e atia’e. Ona o le moemoenoa ma le laufā lē ainā. E ui o le soifuaga e solofuea ma faagalutu’ia i puapuaga o le olaga, a ua loa ona i fale le matega tatou te militino faatasi ma lelei ma faaletonu, e tua foi afā i maninoa, tua foi maninoa i afā. E a’oa’o mai foi le tatalo lauiloa a le Fai-Salamo; ***“Tatou te savavali lava i le vanu o le ata o le oti.”*** Ia sauni ma tapena mo ni faigata o lenei tausaga fou, ae faamoemoe i le Atua mo se taunuuga manuia. Ua logo i tino i le loto o Keriso le matuitui ma le ogaoga o puapuaga o le a faafetaia’i ma IA. Pei ona lilifa i ai molimau a fai-evagelia e fa, ina ua talatala e Luka i sana vaaiga faafoma’i, pe a oo ina to to tetele ni mafatiaga e aafia ai lagona o le tino, mafaufau, loto ma le agaga o soo se tagata soifua, ina ua taufao le mai ma le magalo i le soifua ma le ola. E faapena se vaaiga a Luka, ina ua luluti ma fetuleni atu lagona mafatia ma le ātu o le Alii feagai ma puapuaga o le oti, sa peiseai ai le afu o Iesu o ni alualu toto ua pa’ū ifo i le eleele. E ui i lenei vaaiga faamomoi loto ua oo i ai le Alii, ina ua sāvea fua le maaveave le fua, ona o le tagata ma lana agasala. E maimoa ma le ootia loloto i le tala a le Fai-Evagelia. ***“Ua puapuaga o ia, ua atili ai lana tatalo.”*** Ua silafia e lona Tamā o i le lagi ua gagaifo ma faaluafesasi le loto o si ona atalii. E le’i tapatautali lana tapuaiga, a ua ia auina mai le agelu e faamalosi ia te ia. Le Ekalesia e, ia tatou sauni ma tapena mo ni faigata, ae faamoemoe i le Atua mo se taunuuga manuia. E le pine le folauga o lenei tausaga fou ma ni ona faigata, e le moemoenoa le fili, e osofia pea lou lua sa folau e peau lagavale, e i le ala foi le maa tui, maa gao ma le maa faalavea aao. A’o le molimau a Luka; ***“ua puapuga o ia, ua atili ai lana tatalo.”*** **“O LE TATALO”** o le aupega lea tatou te ta ai i luma faatasi ma le Atua, mo se taunuuga manuia o lenei tausaga fou. Ia manatua, o Iesu o le tautai na maalili lava ma sapai oe ma a’u i luga o le satauro. Manuia le Tausaga Fou.

Tatalo Faafetai:

la faafetaia le Atua i lana pule aoao ma vavega tetele ua ia faia, ua tatou aulia mai ai le Aso Sa muamua o lenei tausaga fou. Ua potopoto mai aiga, nuu ma le ekalesia, se'i momoli atu le taulaga o le loto faafetai e sulaina ai ma ailao manū ua maua, ina ua feiloai ma feofoofota'i ma e sa vava mamao. la faafetaia foi ana meaalofo o le ola mai lena tausaga ua mavae, seia oo mai i lenei aso. O ana faamalologa, faamafanafanaga ma lana faasinoga tonu i mea tatou te manuia ai. I le ma le ola e faavavau na tapenaina e Iesu Keriso i lona soifua mo le faamagaloina o agasala a le tagata, ma lona Toetu Manumalo mai le oti. *(faaaauu tatalo faalotoifale)*

Tatalo Faatoesega:

la tatou faatoese i le Atua, ona o lo tatou ola to'ilalo ma le faia'ina pea, ona ua tatanu ma ufiufi mea pi'opi'o ma leaga ua tatou fai. Ua tusitusi lima ma tuua'i fua le leaga i nisi. la faatoese foi ina ua leai so tatou faamaoni ma se alofa e faatino ai le auaunaga i o tatou tuaoi pei ona finagalo i ai Keriso. la faatoese foi le tasi i le isi e tupu ai le fealofani ma tausia ai le filemu o le faigamalaga o lenei tausaga fou. *(faaaauu tatalo faalotoifale)*

Tatalo Manaoga:

la tatou tatalo ma faatoga atu; Le Tama e, o lou alofa tunoa e laveaina ma ta'ita'iina saogalemu ai la matou folauga o lenei tausaga fou. O la matou olega ia e foa'i mai le loto matala ma le faautatua, o le loto tetele ma le onosai, o le finafinau ma le tauivi, o le loto gatasi ma le manatu e tasi, aua faamoemoega, lavasiga ma fuafuga fai o lenei tausaga. E talosia foi i a matou tatalo si o matou atunuu i ona ta'ita'i se'ia oo lava i alo ma fanau, aemaise Samoa, i paia ma lona mamana e leoleoina ai i lenei tausaga fou. Manuia le Tausaga Fou 2025. *(faaaauu tatalo faalotoifale)*

E momoli atu Alofaaga ma Faamanuiaga o le Tausaga Fou 2025!

Saitumua & Rosa Tafaoialii (FT)
EFKS-UTAH

LOTU TALOSAGA 2025

EKALESIA FAAPOTOPOTOGA KERISIANO SAMOA



ASO LULU: 01. IANUARI - ASO SA: 05. IANUARI 2025

